



K E M E N T E R I A N K E R J A R A Y A

KENYATAAN MEDIA

CABUTAN UNDI 54 KERJA PENYENGGARAAN JALAN ZON SELATAN BERNILAI RM21.56 JUTA UNTUK KONTRAKTOR KECIL BUMIPUTERA G1-G4

KUALA LUMPUR – Yang Berhormat Datuk Seri Ahmad Maslan, Timbalan Menteri Kerja Raya Malaysia hari ini telah menyaksikan dan seterusnya turut membuat cabutan undi bagi Program Penyenggaraan Jalan Persekutuan Semenanjung Malaysia - Zon Selatan Tahun 2024. Program Penyenggaraan ini terbahagi kepada dua iaitu Penyenggaraan Berkala Pavemen (BP) dan Berkala Bukan Pavemen (BBP) yang melibatkan kerja-kerja di negeri Johor, Melaka dan Negeri Sembilan.

2. Perlantikan kontraktor secara cabutan undi ini dikhususkan kepada Kontraktor Bumiputera Gred G1 – G4 yang layak samada dari segi rekod prestasi dan mempunyai pendaftaran lesen yang masih sah dengan Lembaga Pembangunan Industri Pembinaan Malaysia (CIDB), mempunyai Sijil Taraf Bumiputera (STB), dan berdaftar mengikut had nilai kerja yang disenaraikan. Kerja-kerja penyenggaraan di tiga negeri tersebut adalah melalui syarikat Selia Selenggara Selatan Sdn. Bhd. yang telah dilantik sebagai syarikat konsesi yang bertanggungjawab untuk menyenggara Jalan Persekutuan Semenanjung Malaysia di Zon Selatan.

3. Pada bulan Ogos 2024, Kementerian Kewangan Malaysia (MOF) dan Kementerian Ekonomi telah meluluskan peruntukan tambahan penyenggaraan jalan persekutuan seluruh Semenanjung Malaysia bagi memperkasa Kontraktor Bumiputera G1-G4. Jumlah kerja yang diluluskan adalah bernilai RM100 juta dengan pecahan RM70 juta untuk Berkala Pavemen (79 kerja penyenggaraan) dan RM30 juta untuk Berkala Bukan Pavemen (200 kerja penyenggaraan).

5. Bagi Zon Selatan, sebanyak **18 kerja Berkala Pavemen bernilai RM15.06 juta** ditawarkan dengan Johor 10 kerja (RM8.05 juta), Melaka 2 kerja (RM1.61 juta) dan Negeri Sembilan 6 kerja (RM5.4 juta). Kerja-kerja penyenggaraan jalan **Berkala Pavemen** melibatkan kerja pembaikan turapan dan struktur jalan yang rosak menggunakan pelbagai teknik yang bertepatan dengan jenis kerosakan seperti *mill & pave*, *overlay*, pembinaan semula struktur jalan (reconstruction) dan menurap semula turapan jalan.

6. Manakala bagi **Berkala Bukan Pavemen, sebanyak 36 kerja bernilai RM6.5 juta** ditawarkan. Pecahannya ialah Johor 19 kerja (RM3.7 juta), Melaka 6 kerja (RM555 ribu) dan Negeri Sembilan 11 kerja (RM2.245 juta). Penyenggaraan Berkala Bukan Pavemen melibatkan kerja-kerja pembaikan aset-aset jalan selain daripada struktur dan turapan jalan seperti mengecat garisan jalan, penyenggaraan jambatan, membaiki longkang, membaikpulih papan tanda, membaiki penghadang jalan dan sebagainya.

7. Jabatan Kerja Raya (JKR) akan memantau kualiti kerja serta menilai prestasi setiap kontraktor dan penilaian tersebut akan dijadikan asas sama ada kontraktor berkenaan layak untuk dipertimbangkan dalam proses pemberian kerja di masa hadapan.

8. Kementerian Kerja Raya (KKR) berharap agar semua kontraktor yang terpilih melalui cabutan undi ini akan memberikan penekanan kepada aspek mutu kualiti terutama dari segi mengikuti spesifikasi standard yang ditetapkan, kos dan masa, serta mengutamakan keselamatan di kawasan kerja. KKR melalui JKR tidak akan berkompromi terhadap isu-isu berkaitan kualiti kerja pembinaan dan penyenggaraan dalam memastikan keselamatan dan keselesaan pengguna jalan raya sentiasa diutamakan selaras dengan hasrat Program MYJalan KKR.

#Tamat#

KEMENTERIAN KERJA RAYA
29 OGOS 2024